



法幢錄

哲聞編述

昔怡山禪師華嚴發願文有言：樹法幢於處處，破疑網於重重。樹立法幢，為從上古德繼往開來唯一大事，我何人斯，敢語於此。顧老去生涯，既守「不寫人間無益文字」之誡，惟有深入經藏，日飭法味，藉資頤養性地，懺除宿障而已，冥契之餘，因思轉而舉以示人，絕非出於我之識邊知見，當亦不致誤人入於歧途，遂不避抄書匠之譏，以淺近字句隨處撫述若干，聊供主編者填補空白云。

學人奚哲聞誌。

杜鴻漸問法無住禪師

唐益州保唐寺無住禪師，得法於五祖下第四世無相大師，居南陽白崖山時，專修寂定，學者紛至，勤請示誨，師不得已而廣演言教，唯以無念為宗。唐宰相杜鴻漸，出撫河南，聞師名，思一瞻禮，特遣使者到山延請。同時節度使崔寧，亦命諸寺僧徒遠出迎接，至空慧寺，杜公與崔帥召集三學（戒定慧）碩德，俱會寺中，公問，弟子聞和尚說，無憶無念莫妄三句法門，是否？師曰：是，公問此三句是一是三？師說：無憶名戒，無念名定，莫妄名慧，一心不生具戒定慧，非一非三也。公問後句妄字，莫是從心之忘乎？師說，從女者是也。公問有證據否？師說：法句經云：若起精進心，是妄非精進。若能心不妄，精進無有涯。杜公於言下疑情盡釋，遂又問師還以三句示人否？師說：初心學人，還令息念，澄停識浪，水清影現，悟無念體，寂滅現前，無念亦不立也。其時庭樹鴉鳴，公問師，聞否，師曰，聞。鴉去，公又問師，聞否？師仍答，聞。公云，鴉去無聲，云何言聞。師乃普

告大眾曰，佛世難逢，正法難聞，各各諦聽。聞無有聞，非關聞性，本來不生，何會有滅。有聲之時，是聲塵自生，無聲之時，是聲塵自滅，而此聞性，不隨聲生，不隨聲滅，悟此聞性，則免為聲塵之所轉。當知聞無生滅，聞無去來，公與僚屬大眾皆稽首。

杜公又問何名第一義，第一義從何次第得入。師說：第一義無有次第，亦無出入，世諦一切有，第一義即無。諸法無性性，說名第一義，佛言，有法名俗諦，無性第一義。公曰，如師開示，實不可思議。

公又問，弟子性識微淺，昔年因公餘之暇，撰得起信論疏兩卷，可得稱佛法否？師曰：夫造章疏，皆用識心思量分別，有為有作，起心動念，纔可造成。據論文云：當知一切法從本以來，離言說相，離名字相，離心緣相，畢竟平等，無有變異，唯有一心，故名真如。今相公著言說相，著名字相，著心緣相，既著種種相，云何是佛法。公起立作禮曰，弟子亦曾問過供奉佛法諸大德，皆贊弟子不可思議，當知彼等但徇人情，大師今從理解說，合心地法，實是真理不可思議。公又問云何不生，云何不滅，如何得解脫。師說：見境心不起名不生，不生即不滅，既無生滅，即不被前塵所縛，當處解脫。不生名無念，無念即無滅，無念即無縛，無念即無脫，舉要而言，識心即離念，見性即解脫，離識心見性外，更有法門識無上菩提者，無有是處。公問，何名識心見性？師說：一切學道人，隨念流浪，蓋為不識真心，真心者，念生亦不順生，念滅亦不依寂，不來不去，不定不亂，不取不捨，不沉不浮，無為無相，活潑潑平常自在，此心體畢竟不可得，無可知覺，觸目皆如，無非見性也，公與大眾作禮稱贊，踊躍而去。

圭峯禪師「禪源諸詮」序略

華嚴五祖圭峰宗密禪師，未披剃前，精通儒書，深探釋典。赴貢舉途中，遇病僧付四祖澄觀國師之華嚴疏鈔，師向未聽習，一覽即開講，自欣所遇曰，向者諸師對此述作，極少能窮盡經旨，不及此疏流暢幽蹟，遂上書疏主，遙叙師資，往復尋參，入都執弟子之禮，澄觀大師曰，毘盧華藏能隨我遊者，其在汝乎，師自此預大師之室，唯日新其德，而認筌摸象之患永亡矣。後北遊清涼，四住草堂寺，復入終南圭峰蘭若，唐帝屢徵入宮請問法要，朝士歸慕，唯相國裴休深入堂奧，受教爲外護。師以當時禪教兩派學者，互相非毀，遂著「禪源諸詮」，錄諸家所述，詮表禪門根源道理，文字句偈，集爲一藏，以貽後代。其序畧云：禪是天竺之語，俱云禪那，此地云思維修，亦云靜慮，皆定慧之通稱也。源者是一切衆生本覺眞性，亦名佛性，亦名心地。悟之名慧，修之名定，定慧通名爲禪。此性是禪之本源，故云禪源，亦名禪那理行者。此之本源是禪理，忘情契之是禪行，故名理行。然今所集諸家述作，多談禪理，少說禪行，故且以禪源題之。今時有人，但目眞理性爲禪者，是不達理行之旨，又不辨華竺之音也。然非離眞性，別有禪體，但衆生迷眞合塵，卽名散亂，背塵合眞，方名禪定。若直論本性，卽非眞非妄，無背無合，無定無亂，誰言禪乎。況此眞性，非唯是禪門之源，亦是萬法之源，故名法性。亦是衆生迷悟之源，故名如來藏。藏識亦是諸佛萬德之源，故名佛性。亦是菩薩萬行之源，故名心地。萬行不出六波羅密，禪者六中之一，當其第五，豈可都目眞性爲一禪行哉。

一貫別傳摘要

明季四川忠州聚雲寺廣眞大師，別署吹萬野人，源出宋代徑山大慧宗杲禪師一派，於釋教外，儒學玄理，無不淹博會通。所傳撰著多種，中有一貫別傳五卷，別開手眼，茲隨筆摘述，以彰妙義。

心經總說

性體冲虛廣漠，無處不周，煩惱不亂，禪定不寂

，說他是有，則纖塵不立，說他是無，則橫徧十方，非內非外而能內外，非有非無而能有無，非動非靜而能動靜，隨緣不變，不變隨緣，自在在者也。菩薩觀之而取證，所以名曰自在菩薩，行之而至於究竟本源處，所以云甚深般若。劈破面門，通身露出，舉步踏着，開口道着，夜夜同眠，朝朝共起，所以云照。但是觀者不觀之以目，而觀之以耳，照者不照之以心，而照之以虛，耳返於虛，五蘊卽空矣。空非空無之空，乃五蘊轉復到本源而同一佛性，所以云空也。永嘉大師所謂無明識性卽佛性，正見色空不異也。五蘊既歸於眞空，何嘗生滅增減，故根非色質之根，乃清白梵行之相也。塵非對我之塵，乃無量之妙義也。識非妄生之識，乃恆沙之妙用也。示四諦非四諦，借黃花而顯相，示因緣非因緣，假翠竹以現行，所以云無眼耳鼻舌身意，無苦集滅道，無生老死等等也。菩薩於此與如幻三昧，而隨流得性，故云遠離諸佛。以此具足圓覺而能住持，故云菩提。吹萬曰：本自不迷，用悟作麼，本自無失，得個甚麼，持念心經者亦復如是。

金剛經五眼 古德有註云，「肉眼喻非通」，是佛之肉眼，果真有礙而不通乎？吹萬曰，若是凡夫之肉眼則可，倘佛之所具，似不可模糊放過也。如來兩目青眸，不異凡夫，以此能知四生六道，升沉因果，故曰肉眼。佛性先天而天弗違，稱爲天中之天，以此能知三界九地差別因緣，故曰天眼。如來具四智，證六通，身徧無量世界，明了三世因果，故曰慧眼。如來自菩提場三七日思維，轉十二行法輪，宣說五時半滿之教，末後拈花直指妙心，故曰法眼。如來具足圓覺，住持圓覺，現八萬四千相好光明藏身，坐恆河沙世界刹海金蓮，故曰佛眼。要得具此五眼，不可向外別求。所以道：盡十方世界在沙門一隻眼裏，會得麼。

一切諸佛所護念經

世尊演說彌陀樂土功德，眞正不可思議，舉出諸佛稱讚護念此經及持經之人，利益廣大，所以諸佛稱讚護念者，護其念也，一念方萌，萬機齊出，善惡好醜，無所不爲，收一念復於天性，護持不動，自然定慧有常，此是修行眞常之路也。彌陀釋迦會如此護念，十方諸佛亦會如此護念，現在衆生亦必如此護念，故曰所護念經。